



札
樸

卷一之二
溫經



嘉慶癸酉鑄

札樸

山陰小李山房藏板

序

友有相慕而終不可見者未始非神交也余自癸丑歸隱
錢少詹曉徵王侍御懷祖盧學士紹弓因知曲阜有桂
君未谷者學問該博作漢隸尤精而不得見覲其南來
或可見之已而未谷由山左長山校官成進士出宰雲
南永平以爲是恐難見矣余僑居姑蘇久壬申薄遊新
安而歸得晤山陰李君柯溪刻未谷所撰札樸十卷方
成屬余序之余甚喜以爲未谷雖不可見而猶得見其
遺書也未谷深於小學故經史子集古言古字有前人
言之未能了了而一旦砉然理解者豈非訓詁家斷不

木橋戶
可少之書耶况其考核精審有資於博物者不可枚數
柯溪亦官滇與未谷時多商推論定柯溪之告歸也未
谷以此書授之俾刻之江左未谷是年沒於官而柯溪
乃於十年後解囊刻之不負鄭重相託之意是真古人
之友誼可以風示末俗者矣抑柯溪言未谷尙有說文
正義六十卷爲一生精力所聚今其彙藏於家吾知海
內必有好事者取而刻之持贈後學庶不見未谷者可
以見未谷之全也哉嘉慶十八年七月中元日金壇段
玉裁書於閶門外枝園

桂未谷札樸序

古之學者有四曰義理之學曰經學曰史學曰辭章之
學而考據不與焉非無考據也考據卽寓於四者之中
也我朝學者始有考據專門其大要本之三通玉海等
書蓋以百餘年來欣逢

稽古右文之主惟時在朝在野者能以實學相尙其所
撰述俱足裨益治體沾溉藝林故治經者有李安溪方
望溪諸君考古者有閻百詩沈自南諸君訂譌者有毛
西河胡鳴玉諸君辨證金石與山川古蹟者有王竹雲
錢竹汀顧亭林陳宏緒諸君今讀曲阜桂未谷大令之

札樸而服其學之有兼長也大令負穎異之姿博極羣書自六經諸史象緯輿地財賦河渠算數歷律之學與夫六書聲韻方言風俗之類罔不根究其原委剖悉其疑似所列書目有六首溫經以漢唐注疏爲本參以各家之說其折衷之權當則安溪望溪也次覽古其援據之宏富考覈之精詳則百詩自南也次匡謬嚴而不失之苛辨而不失之鑿則西河鳴玉也次金石文字其搜羅墨本有出於集古金石錄之外者則可與竹雲竹汀鼎足也次鄉里舊聞次滇遊續筆則方駕乎亭林之營平地名記宏緒之江城名蹟記也雖曰考據專門而引

證奧博詞藻古雅實能兼義理經史辭章四者之長而自成一家之言豈剽賊陳言者所敢闖其門逕哉昔人論朱竹垞工詩古文詞而兼長考證以大令視之其何能多讓乎大令以名進士出宰滇南退食之暇撰成是編貧不能付梓乃以艸稟授同寅山陰李柯溪少尹少尹風雅好古敦氣誼重然諾遂出已財屬浙西鮑淥飲先生校刊時先生年八十餘終日不釋丹鉛見此書以爲得未曾有乃潛心讐對凡五閱月而歆劂奏功先生手所刊本兩過鶯脰湖委余爲序夫余與大令神交二十餘年每以未得與之上下其議論爲憾今得讀其平

生之著述差足慰向慕之心也余竊惟爲學而至於考
據考據而至於如是之精權其爲傳世行遠固鑿然而
無疑者况又得少尹與先生資助而告成之其有功於
大令豈淺鮮哉而余得附名卷末亦厚幸矣若欲弁言
簡端則我豈敢

嘉慶癸酉歲大暑節前二日吳江翁廣平拜手撰

札樸第一目錄

溫經

悶

禡

覓陸

鼻

冶容

甲拆

平秩

昏墊

拯

輿說輶

日中見沫

旬

卦氣值日

靜言

六宗

載

文選引書句讀

予弗子

臣哉鄰哉

邁

夔夔

下土墳壚

赤埴墳

畧

東出於陶丘北

雲土夢

三江

齒革羽毛

怪石

刻

執夷

考終命

蒙

不昏作勞

度乃口

占

宅心知訓

無逸

咸和萬民

天命自度

耽樂

翼日翼室

罔可念聽

不克開於民之麗

予造天役

天闕嗟我成功所

既底法

越茲蠹

燄燄庸庸

頒

師聽五辭

泯泯芴芴

攘

格命

惟貌有稽

徐奄

獲筭

罔攸賓

簡

直

餘波

莠

態

椽杙

湘

藟

蘊結

鶉之奔奔

聊

諛草

剝棗

熯熯

餽

訛

芑

警警

會朝清明

魚鼈

名

緝

厭厭

平平

馬祖

赫

蹂潤

禮天子所御

善走

柞

喈喈淒淒

濺濺

淵回

抗

夜何其

第

靡神不宗

讐

九折之澤

翳

媚

掃

墜

荼

謹就

駟駟牧馬

疹

忖度

服箱

變

適

優

升氣

唐棣

繼檠

蕪

演安

厭

啐

苟敬

韋當

繹

搯

絹綱耳

豐

掘

楣

聘禮記脫誤

修止

種麥

鵠

凌室

楅室

失色

相保

求牛

藥

師都

琢駟

忌

翦闔

五盾

畿

椀

司刺

毘

枯

要辭

軋

駟琮

伯用將

鬣落

縑緣

雉

經

次舍

學官

呼

陵躡

桃茹

防墓崩

子卯

惊

稗

謙

示諸掌

洩

脩

五庫

益其長

今月令

均田

坯

麻疇

爛

畛于鬼神

箭筈

績

札樸第一目錄終

札樸第一

往客都門與周君書昌同游書肆見其善本皆高閣

又列布散本於門外木板上謂之書攤皆俗書周君

戲言著述不慎但恐落在此輩書攤上也他日又言

宋元人小說盈箱累案漫無關要近代益多枉費筆

札耳今與君約無復效尤馥曰宋之夢谿筆談容齋

五筆學林新編困學紀聞元之輟耕錄其說多有根

據卽我

朝之日知錄鈍吟雜錄潛上札記皆能霑溉後學說

曲阜

桂馥

未谷



部非不可爲亦視其說何如耳嘉慶紀元之歲由水
程就官滇南舟行無以遣日追念舊聞隨筆疏記到
官後續以滇事凡十卷以其細碎竊比匠門之木枅
題曰札樸烏呼周君往矣惜不及面質當落書攤上
不邪壬戌八月忍媿陋生桂馥書於順寧

溫經

悶

易乾卦遯世無悶呂氏春秋本生篇下爲匹夫而不悞
高注悞讀憂悶之悶義亦然也

拯

明夷用拯馬壯鄭注拯承也艮卦不拯其隨釋文作承
音拯救之拯玉篇承下引聲類云拚字列子黃帝篇使
弟子竝流而承之注云承音拯馥案字本作拚與承聲
義相近魏晉人因造承字隋唐人改作拯鄭注天官職
幣地官司徒竝作拚

褫

訟卦或錫之鞶帶終朝三褫之鄭本褫作拈淮南人間
訓秦牛缺遇盜拈其衣被高注拈奪也

輿說輶

大畜輿說輶鄭本作輶云輶伏兔考工記加軫與輶焉

鄭司農云鞮謂伏兔也疏云伏兔漢時名今人謂之車
屐是也左傳正義云子夏易傳輶車下伏兔也今人謂
之車屐形如伏兔以繩縛於軸因名縛也馥案伏兔卽
鄭本之鞮也名縛者輶也孔君以縛與伏兔皆爲輶誤
小畜輿說輻釋文云輻本亦作輶馬云輶車下縛也

莫陸

莫陸夬夬虞翻本作莫睦云莫說也莫讀如夫子莞爾
而笑之莞睦和睦也案詩新臺燕婉之求說文引作睨
婉睨目相戲也

日中見沫

廣韻昧莫撥切星也引易日中見昧易釋文云沫徐武
蓋反又亾對反微昧之光也字林作昧亾太反云斗杓
後星王肅云音妹鄭作昧服虔云日中而昏也子夏傳
云昧星之小者馬同薛云輔星也馥案此言鄭及子夏
作昧與字林王肅異轉寫誤爲昧若果作昧則與字林
王肅同無事煩言矣釋名曠末也說文曠或作糝春秋
隱元年公及邾儀父盟于蔑公羊穀梁竝作昧文七年
晉先蔑奔秦公羊作昧以聲求之當從本末之末說文
無昧字或脫漏

玉篇昧莫割切星名又有兩昧字一音莫潰切冥也

昧爽旦也一音莫蓋切明也又斗柄此爲宋人重修所亂

鼻

玉篇鼻馬縣足馬後左足白具此二義易乘馬驢如馬融曰驢如不進之貌震爲馬鼻足故驢如馥謂此縣足之說也說卦其於馬也爲鼻足虞翻曰馬白後左足爲鼻震爲左爲足初陽爲白也馥謂此後左足白之說也

旬

豐卦雖旬无咎王注旬均也馥案說文旬徧也均平徧也釋訓昫昫田也釋文云本或作煦字林云均均田也

冶容

太平廣記引易蠱容誨媯南都賦侍者蠱媚五臣作冶媚一切經音義云聲類蠱弋者反周易作冶冶容誨媯劉瓛曰冶妖冶也西京賦妖蠱豔夫

卦氣值日

京氏易以卦氣值日其法精密余考之易軌而得其說蓋以坎震離兌四卦卦別六爻爻生一氣主二十四氣其餘六十卦三百六十爻爻主一日餘五日四分日之一以通閏餘

甲拆

解卦雷雨作而百果草木皆甲拆鄭本作甲宅注云皮
曰甲根曰宅馥案蜀都賦百果甲宅

靜言

堯典靜言庸違傳云靜謀也言其工自爲謀言起用行
事而違背之文十八年左傳說其工云靖譖庸回注云
靖安也庸用也回邪也文十二年公羊傳惟譏譏善淨
言何休云淨猶撰也馥謂靜靖淨皆假借當爲諍謂其
善爲諍語說文訏下云諍語訏訏也

平秩

平秩東作大傳作辯秩周禮馮相氏辯其序事以會天

位鄭注辯其序事謂若仲春辯秩東作仲夏辯秩南譌
仲秋辯秩西成仲冬辯在朔易詩采菽平平左右傳云
平平辯治也韓詩作便便左傳引作便蕃服虔云平平
辯治不絕之兒洪範無黨無偏王道平平傳云言辯治

六宗

六宗鄭氏以爲星辰司中司命風師雨師案月令孟冬
之月天子乃祈來年於天宗鄭注天宗謂日月星辰也
季冬之月乃畢山川之祀及帝之大臣天之神祇鄭注
孟月祭其宗至此可以祭其佐也帝之大臣句芒之屬
天之神祇司中司命風師雨師馥案鄭旣以司中司命

風師雨師爲宗今又以爲佐其說六宗有星辰無日月其說天宗則日月星辰兼有豈天宗六宗各別不相涉耶蔡氏月令章句說天宗云日爲陽宗月爲陰宗北辰爲星宗五經異義賈逵說六宗云天宗三日月星辰地宗三泰山河海蔡說天宗與賈六宗同賈說六宗與古尙書說同司馬彪說六宗云天宗日月星辰寒暑之屬地宗社稷五祀之屬四方之宗四時五帝之屬諸說雖異要當以天宗歸於六宗也

昏墊

洪水滔天下民昏墊孔傳言天下民昏瞽墊溺皆困水

災也張景陽詩洪潦浩方割人懷昏墊情李善注引孔傳以爲人病水災案謝靈運游南亭詩久痾昏墊苦此言久病竝無水患成六年左傳民愁則墊隘杜注墊隘羸困也襄九年傳夫婦辛苦墊隘杜注墊隘猶委頓唐張廷珪上疏或謂人窮不足恤而億兆攜離愁苦昏墊則無以奉上矣

載

舜典有能奮庸熙帝之載傳云言奮起其功以廣帝堯之事甘泉賦上天之緯李善注緯事也引詩上天之載案說文宰臯人在屋下執事者載緯訓事其義出於宰

文選引書句讀

文選應貞詩聲教南暨李善注引尚書朔南暨聲教晉書地理志夏后氏東漸於海西被於流沙南浮於江而朔南暨聲教案漢書賈捐之曰西被流沙東漸於海朔南暨聲教言欲與聲教則治之不欲與者不彊治也馥謂自漢至唐皆以聲教絕句宋人始屬下讀

子弗子

啓呱呱而泣子弗子釋文子鄭將吏反案列子說符篇禹惟荒土功子產弗字孔傳聞啓泣聲不暇子名之皆與鄭讀同禮內則父執子之右手咳而名之說文咳小

兒笑也李善文選注引字林同史記扁鵲傳曾不可以告咳嬰之兒注謂嬰兒初知笑者馥謂咳而名之兒知笑已漸長矣呱呱而泣初生未久也一言泣一言笑皆謂名子事也

臣哉鄰哉

皋陶謨帝曰吁臣哉鄰哉鄰哉臣哉傳云鄰近也言君臣道近相須而成馥謂鄰卽下文欽四鄰之鄰傳以四鄰爲四近是也尚書大傳古者天子必有四鄰前曰疑後曰丞左曰輔右曰弼

邁

木抄卷一
莊八年左傳引書皋陶邁種德杜注稱皋陶能勉種德邁勉也馥案借邁爲勸書立政用勸相我國家傳云用勉治國家釋文云勸音邁左傳距躍三百杜注百猶勵也釋文作勵音邁

夔夔

大禹謨夔夔齊慄正作倏倏方言倏倏也

下土墳壚

禹貢豫州下土墳壚馬融注豫州地有三等下者墳壚也豫州地青鄭注壚疏也梁州厥土青黎王肅注青黑色黎小疏也馥謂壚黑剛土今說文壚下脫黑字堦訓

赤剛土則壚爲黑剛土矣馬謂豫州地青青卽黑故王云青黑色

赤埴墳

徐州厥土赤埴墳埴鄭本作哉注云哉讀曰熾熾赤也案赤古文从炎土作塗禹貢古文當作塗鄭訓赤義同略

胡渭曰嶠夷旣略略字必有精意按左傳曰天子經略諸侯正封古之制也封略之內何非君土又曰封畛土略又曰侵敗王略略皆訓界經略猶言經界也馥案略字見左傳者除胡所引尙有七處莊二十一年傳王與

之武公之略注云略界也僖十五年傳東盡虢略注云東盡虢界也此二處皆訓界又隱五年傳吾將略地焉注云略總攝巡行之名宣十一年傳略基趾注云略行也昭二十四年傳楚子爲舟師以略吳疆注云略行也此三處皆訓行又僖十六年傳會于淮謀郟且東略也宣十五年傳晉侯治兵于稷以略狄土此二處亦行義馥謂禹貢略字當主巡行經略其畫疆定界卽經略之所有事也漢書地理志自昔黃唐經略萬國燮定東西疆理南北吳都賦故其經略上當星紀拓土畫疆卓犖兼并

東出於陶丘北

導水東出於陶丘北說文陶下引作東至于陶丘無北字李善注文選應貞詩顏師古注漢書高帝紀引說文亦無北字丘古文作塋或以塋之一字誤爲丘北二字歟鄭氏云言至于者或山或澤皆非水名據此則鄭木亦作至于矣禹貢下文云又東至于菏是先至于陶丘又至于菏菏卽澤也鄭氏詩譜曹者禹貢兗州陶丘之北地名此言曹在丘北非謂水出丘北

雲土夢

荊州雲土夢作又傳作雲夢土解云雲夢之澤在江南

其中有平土丘案夢溪筆談唐太宗時得古本作雲土
夢又案水經沔水又東南過江夏雲杜縣東酈注禹貢
所謂雲土夢作又故縣取名焉馥謂杜古多省作土韓
詩徹彼桑杜今詩作桑土是也

三江

揚州三江既入鄭注三江分於彭蠡爲三孔東入海案
三孔鄭讀爲荊州九江孔殷之孔鄭彼注云九江從山
谿而出其孔衆多是也史記孔殷作甚中與鄭異
四瀆本作四竇謂四孔史晨碑孔瀆亦當爲竇

齒革羽毛

齒革羽毛惟本傳云毛旄牛尾案旄牛出西南夷不屬
揚州此因荊州厥貢羽毛齒革傳以爲與揚州同也荆
州兼四川之東界則有旄牛矣

襄十四年傳范宣于假羽毛於齊齊不產旄牛

怪石

青州鉛松怪石傳以爲怪異好石出岱山之谷此蒙上
文岱畎言之今泰山不出怪石青州之博山益都萊州
之掖縣平度卽墨登州之萊陽福山棲霞皆出異石色
備五彩堅光如玉

刻

微子我舊云刻子傳云我前日所言適以害子晉書樂志亥者劾也言時陰氣劾殺萬物也

執夷

牧誓如虎如貔傳云貔執夷虎屬也郭注爾雅陸璣詩疏竝以執夷爲貔別名陸德明禮記釋文引書傳作執夷反案執夷固可爲貔之反語但作傳者方託於孔孔時無反語豈得不知後人因釋文多反語遂加反字

考終命

洪範五福五曰考終命案此與天祿永終惟永終是圖皆不同鄭注考成也終性命謂皆生佼好以至老也又

注六極五曰惡云貌恭則容儼形美而成性以終其命容毀故惡也據鄭意謂容貌美好至老無殘毀案曾子啓手啓足卽爲考終命子夏失明不得爲考終命孔傳謂不橫夭與一曰壽何異

蒙

大傳五行傳不聖厥咎蒙厥罰恒風鄭注蒙冒也君臣心有不明則相蒙冒矣案洪範咎徵曰蒙恒風若疏引鄭注蒙見冒亂也馥謂蒙無冒義說文冒冡而前也冡覆也洪範借蒙爲冡五行傳之蒙亦當爲冡因前曰冡之文致誤也蓋稽疑曰蒙五行傳作曰冡也咎徵之蒙

當作蒙稽疑之蒙當作蒙其義各異

蒙見冒亂見當爲覓說文覓突前也蒙覓連讀

不昏作勞

盤庚不昏作勞孔傳昏強也鄭注昏讀爲散散勉也釋文昏馬同本或作散音敏爾雅昏散皆訓強故兩存馥案當爲改說文改彊也

西京賦何必昏於作勞薛綜注昏勉也

度乃口

盤庚度乃口釋文度徐如字亦作渡案渡傳寫之誤當爲敷說文敷閉也言閉口毋浮言傳訓法度非是

卣

秬鬯一卣卣周禮作修春官廟用修

宅心知訓

康誥汝丕遠惟商耆成人宅心知訓此言老成人多識前言居心求之自明訓教又云別求聞由古先哲王用康保民此又言遠求之古人故鄭注謂古先哲王虞夏也傳解知訓謂知訓民馥以訓民當爲保民之義知訓則專屬康叔與訓民無涉

無逸

無逸漢石經作勅玉篇勅豫也漢書作佚

咸和萬民

咸和萬民傳云皆和萬民案說文誠和也引周書不能誠於小民此咸亦當作誠誠和竝言古語多如此

天命自度

嚴恭寅畏天命自度漢石經度作亮案亮篆作諒說文諒事有不善言諒也蓋太戊敬畏天命自諒也

耽樂

惟耽樂之從自時厥後亦罔或克壽論衡語增篇說云長夜之飲糟丘酒池不舍晝夜是必病病則不甘飲食困毒而死無逸又曰繼自今嗣王則其無淫於觀於逸

於遊於田以萬民惟正之供無皇曰今日耽樂漢書谷永傳引云繼自今嗣王其毋淫於酒毋逸於遊田惟正之共案經二耽字竝當作酖說文酖樂酒也說此經者皆言酒下文無若殷王受之迷亂酖於酒德哉亦言酒翼日翼室

顧命越翼日乙丑傳曰明日又延入翼室傳曰明室疏引釋言翼明也案說文翮翬也經傳多借字故以明爲翮翼爲翬

罔可念聽

多方罔可念聽傳云事無可念言無可聽案上文惟聖

罔念作狂惟狂克念作聖疑念聽當爲念聖言紂所爲
無可念作聖者無逸此厥不聽漢石經聽作聖蓋聽聖
形近傳寫易譌

不克開於民之麗

不克開於民之麗傳云不能開於民所施政教麗施也
下文慎厥麗傳云慎其施政於民又顧命眞麗陳教傳
云定天命施陳教呂刑越茲麗刑鄭注麗施也又匪察
于獄之麗傳亦訓施案麗當爲麗說文麗數也數當爲
敷廣雅麗布也施敷布義同

周禮以八辟麗邦法杜子春讀爲羅鄭以爲附麗馥

謂當作麗書所謂敬敷五教也

予造天役

大誥予造天役釋文引馬注造遺也案遺當爲邁傳寫
之誤漢書翟義傳引書予遭天役遭有邁義故馬注訓
邁文侯之命嗣造天丕愆孔傳訓造爲遭是造遭以聲
借也

天闕毖我成功所

爾知寧王若勤哉天闕毖我成功所傳云汝知文王若
彼之勤勞哉闕慎也言天慎勞我周家成功所在案此
傳不了闕無慎義訓慎者乃毖字所云慎勞以勞解勤

字而闕竟無訓下文天亦惟用勤愷我民傳云天亦勞
慎我民故知以慎訓愷以勞訓勤也

既底法

若考作室既底法厥子乃弗冑堂矧冑構案底法疑底
定言父已定基址子不冑爲堂構下文罔敢易法王莽
儼之云爾不得易定蓋古文定作命法作命形近致誤

越茲蠹

洪範用靜吉用作凶大誥西土人亦不靜越茲蠹案蠹
卽洪範之作釋詁蠹作也

燄燄庸庸

洛誥無若火始燄燄梅福上書引作庸庸注云庸庸微
小兒也案昭十八年左氏傳是謂融風火之始也杜注
東北曰融風淮南地形訓東北曰炎風高注艮氣所生
也一曰融風馥謂燄燄當爲炎炎庸庸當爲融融張晏
曰融風立春木風也火之母也火所始生也馥謂此雖
言風義通於火

頌

洛誥乃惟孺子頌朕不暇釋文引馬曰頌猶也猶下脫
一字若與鄭義同則當云頌猶分也

師聽五辭

呂刑師聽五辭傳訓師為眾馥謂師士師

泯泯焚焚

泯泯焚焚傳云泯泯為亂焚焚同惡逸周書祭公解泯
泯芬芬孔注泯芬亂也馥案泯正作泯說文泯愾也愾
亂也

攘

奪攘矯虔鄭注有因而盜曰攘費誓無敢寇攘鄭注因
其亡失曰攘博士讀曰襄馥案釋詁攘因也馬注皋陶
謨襄因也

格命

庶有格命鄭注格登也案方言格登也此鄭所據然格
格借字當為假曲禮天王登假列子天下大治而帝登
假漢華山廟碑思登假之道皆以登假連文假即假之
省說文假至也周易王假有廟訓假為至孔傳庶幾有
至命亦以格為至格假無至義訓至者皆假也

惟貌有稽

惟貌有稽傳云惟察其貌有所考合案說文緇旄絲也
引周書惟緇有稽旄當為旋集韻旋絲曰緇言簡有眾
如治旋絲也

徐奄

費誓淮夷徐戎竝興傳云淮浦之夷徐州之戎竝起爲
寇昭元年左傳周有徐奄杜注徐卽淮夷服注魯公所
伐徐戎也案說文魯東有邾城又云周公所誅邾國在
魯公字後人加之當是周所誅也邾邾竝在魯境成王
誅邾魯公滅邾邾卽服氏所謂徐戎

獲穽

杜乃獲斂乃穽鄭注山林之田春始穿地爲穽或設獲
其中以遮獸獲柞鄂也周禮雝氏春令爲阱獲溝瀆之
利於民者鄭注阱穿地爲塹可以禦禽獸其或超踰則
陷焉世謂之陷阱獲柞罟也堅地阱淺則設柞罟於其

中賈疏云柞罟者豎柞於中向上罟罟然所以載禽獸
使足不至地不得躍而出謂之柞罟國語魯語鳥獸成
設穽鄂韋昭注鄂柞格所以誤禽玉篇樗穽也

罔攸賓

多士予惟四方罔攸賓釋文賓徐音殯馬曰賓却也案
賓當爲覘說文覘蔽不見也莫結切廣韻與殯同必刃
切正合徐音今俗作擯戰國趙策六國從親以擯秦又
作賓史記六國表秦小國僻遠諸夏賓之比於戎翟

簡

說文簡下云簡存也從心簡省聲讀若簡徐鍇繫傳引

尚書簡在上帝之心馥謂書古文作簡謂帝心存之也
今借簡字玉篇簡音萌爾雅釋訓存存萌萌在也邢疏
萌字書作蕙說文作簡

亶

書誕告用亶其有衆又亶聰明作元后傳竝云亶誠也
詩亶其然乎又祈父亶不聰又擇三有事亶侯多臧傳
竝云亶誠也

餘波

李善注鸚鵡賦引書導弱水餘波入於流沙或以被爲
波之譌余曰李引經每與今本不同被讀如被孟豬之

被宜存此說

笔

詩關雎左右笔之傳云笔擇也案新唐書韋陟傳窮治
饌羞以鳥羽擇米馥謂笔从毛擇物以羽毛古有此訓
故毛公用之

慙

甘棠召伯所慙釋文云慙本又作揭案揭當爲惕說文
惕息也

椽杙

兔置椽之丁丁傳云丁丁椽杙聲也案六韜椽杙大槌

重五斤柄長二尺以上尚書大傳椽杙者有數隋書元
弘嗣傳每推鞠囚徒或椽弋其下竅漢書酷吏傳楊著
其姓名顏注楊杙也椽杙而書死者名也

湘

采蘋于以湘之維錡及釜毛傳湘亨也廣雅鷓飩也漢
書郊祀志皆嘗鷓亨上帝鬼神顏注鷓亨煮而祀也引
韓詩于以鷓之案說文鷓煮也玉篇鷓與鷓同湘乃借
字

蘭

鄭風方秉蘭兮毛傳云蘭蘭也太平御覽引韓詩蘭蘭

也蘭非蘭訓蘭者蘭香草蘭之屬也案蘭卽蕪山海經
吳林之山其中多蕪草說文蕪草出吳林山廣韻蕪香
草蘭同上馥謂蘭卽蘭字盛宏之荊州記都梁縣有山
山下有水清泚其中生蘭草名都梁香

蕪又與菅通吳越春秋于將曰後世卽山作台麻經
蕪服陳書徐陵傳京邑上墟蕪蓬蕭瑟

蘊結

檜風我心蘊結小雅我心苑結皆謂鬱結也集韻愠窓
竝音鬱心所鬱積也南風歌可以解吾民之愠兮史記
倉公傳宛篤不發荀子哀公篇富有天下而無怨財注

云怨讀爲蒞

鶉之奔奔

鄘風鶉之奔奔鄭箋奔奔言其居有常匹飛則相隨之貌禮表記引詩作賁賁鄭注賁賁爭鬪惡貌呂氏春秋引詩亦作賁賁高注賁賁爲其色不純馥謂高義爲長聊

諛草

焉得諛草言樹之背說文蕙令人忘憂草也引詩安得蕙草或从煖或从宣王伯厚詩考據爾雅音義引詩作菱案爾雅諛忘也施乾說爾雅菱忘也此卽忘憂之說也

剝棗

豳風八月剝棗前賢說剝義未了說文剝裂也務剝也棗埤也言棗孰蒂埤裂而落有似於栗也

熿熿

廣韻炯下云熱氣炯炯出字林爾雅熿熿熏也詩蘊隆熿熿徐邈音徒冬反韓詩作炯炯續漢書郡國志陳畱郡封丘有桐牢亭或曰古蟲牢同蟲聲相近故炯或作

燼廣雅炯熟也熟當爲熱說文舛赤色也從赤蟲省聲
詩變赤從火而蟲則不省蓋燼炯皆舛之或體

餽

角弓如食宜餽毛傳餽飽也鄭箋王如食老則宜令之
飽馥案襄二十六年左傳是以將賞爲之加膳加膳則
飫賜杜注飫饜也酒食賜下無不饜足是餽飫義同說
文餽作醜飫作餼竝音依據切

訊

采芑執訊獲醜傳云訊辭也箋云訊言也案禮王制出
征執有罪反釋奠於學以訊馘告與傳意合傳蓋讀如

秋官小司寇訊羣臣之訊說文辭訟也

芑

薄言采芑陸璣疏云芑菜似苦菜也莖青白色摘其葉
有白汁出脆可生食亦可烝爲茹青州謂之芑西河鴈
門尤美齊民要術引詩義疏蘆苦葵青州謂之芑初學
記引夏小正采芑注云芑蘧也馥案蘧當爲蘆說文蘆
菜也

警警

板聽我囂囂傳云囂囂猶警警也箋云警警然不肖受
馥謂當爲不肖受廣韻警不省語也楚詞九思令尹兮

警警王逸云不聽話言而妄語也

說文徐鉉本警不肖人也韻會引徐鍇本作不肖人言也馥謂不肖當作不省

會朝清明

偃師武億曰楚辭天問會鼃爭盟何踐吾期注云爭一

作請案鼃朝同字

說文鼃讀若朝杜林以為朝旦

請清音相近盟明通

用

詩黃鳥不可與明箋云明當為盟

是屈子引詩會朝清明作問蓋云

以甲子日赴膠鬲請盟之期毛鄭以為日之清明非是

包鼃

韓奕包鼃鮮魚箋云包鼃以火熟之也正義云案字書

魚毛燒肉也魚烝也通俗文曰燖煮曰魚然則包魚與魚

別而此及六月云包魚鼃者音皆作魚然則包魚與魚以火

熟之謂烝煮之也此謂包字音皆作魚者徐音甫九反

是也箋謂包以火熟之者亦魚字義玉篇魚火熟也是

也陳啟源曰毛燒不可施於鼃包作魚為當馥案魚正

作焗說文焗烝也焗轉為包者孚包聲相近罍或作學

桴或作抱桴或作胞呂氏春秋焗人即庖人公羊傳包

來左氏作浮來漢書浮丘伯鹽鐵論作包丘子是也內

則魴鱖蒸雛燒皇侃疏云魴鱖二魚皆蒸熟之雛是小

鳥火中燒之是則魚烝鳥燒自昔皆然鼃亦魚類故宜

煇也

名

齊風猗嗟名兮毛傳云目上為名釋訓同郭云眉眼之間孫云目上平博玉篇引詩作顛云眉目閒也韻會引說文顛眉目閒也今說文無此文或引玉篇誤傳說文也字又作昭西京賦昭藐流眄注云昭眉睫之間

緡

抑荏染柔木言緡之絲傳云緡被也案說文吳人解衣相被謂之緡

厭厭

載芟厭厭其苗箋云厭厭衆齊等等也

平平

采菽平平左右毛傳平平辯治也韓詩作便便云閒雅之兒案漢書敘傳做亦平平文雅自贊即韓詩閒雅之意

馬祖

吉日既伯既禱毛傳伯馬祖也重物慎微將用馬力必先為之禱其祖漢書敘傳類禡厭宗應劭曰禡馬祖也馬者兵之首故祭其先神也馥案周禮校人春祭馬祖

鄭注馬祖天駟也孝經說曰房爲龍馬釋天天駟房也
郭注龍爲天馬故房四星謂之天駟

赫

大雅反予來赫鄭箋口拒人謂之赫釋文赫亦作嚇鄭
許嫁反毛音許白反莊子秋水篇鴟得腐鼠鷓鴣過之
仰而視之曰嚇司馬注云怒其聲恐其奪已也釋文嚇
許嫁反又許伯反晉涼武昭王述志賦穢鴟鳶之籠嚇
欽飛鳳於太清案廣韻嚇呼格切怒也漢舊律有劫略
恐獨科其字作獨獨赫聲近赫借字嚇俗字晉書音義
獨相恐也史記王子侯表葛魁節侯寬坐縛家吏恐獨

受賕棄市漢書平城侯禮坐恐獨取雞免承鄉侯德天
坐恐獨國人受財臧五百以上免籍陽侯顯坐恐獨國
民取財物免王莽傳各爲權勢恐獨良民顏注獨以威
力脅之也音呼葛反戰國策恫疑虛獨高誘注獨喘息
懼兒晉張裴上律表律有事狀相似而罪名相涉者守
將中有惡言爲恐獨通作曷又作喝僖十四年公羊傳
注杞王者之後尤微是見恐曷而亾戰國策橫人日夜
務以秦權恐喝諸侯以求割地又譌作喝通鑑開元初
侍御史楊瑒廷曰若糾彈之司使奸人得而恐喝則御
史臺可廢矣

蹂潤

大雅或簸或蹂箋云蹂之言潤也正義云蹂黍以水潤米必當蹂之使濕馥案蹂當爲徠說文徠復也謂揆抄也文字集畧煩擗猶揆抄也考工記鮑人進而握之鄭注謂煩擗之也是潤當爲擗正義以爲水潤米失之

禮天子所御

生民傳云后妃率九嬪御乃禮天子所御帶以弓韉授以弓矢於郊禘之前鄭注月令亦引作禮又引王居明堂禮帶以弓韉禮之禘下馥案禮蔡氏月令章句作醴云飲以醴酒後漢禮儀志注引作飲之以禮皆沿毛傳

之誤

善走

駟以車釋釋傳云釋釋善走也釋文作善足云釋崔本作驛漢書音義如淳曰律四馬高足爲傳置中足爲馳置下足爲乘置馥謂高足卽善足

柞

周頌載芟載柞毛傳除木曰柞周禮夏官柞氏掌攻草木馥案柞依字當爲槎柞槎聲相近集韻柞與槎同說文槎衰斫也引春秋傳山木不槎中庸疏獲謂柞樗也柞樗亦衰斫之木

喈喈淒淒

淒其以風又風雨淒淒說文引詩作喈喈又北風其淒
毛傳云淒疾貌子虛賦作淒淒亦疾貌

濺濺

施眾濺濺釋文引馬云濺大魚網目大豁也馥案馬義
當爲齎齎說文齎空大也讀若詩施罟濺濺馥謂說文
引詩施罟齎齎以證空大後人改爲濺濺又加讀若二
字遂使詩與說文並失其義矣說文濺下引詩施眾濺
濺後人加之非許所引也

淵回

秉心塞淵其心塞淵其德不回求福不回徐方不回到
猶違也左傳君無違德論衡引作回德塞淵卽左傳昭
德塞違也會稽典錄虞翻稱丁固塞淵好德

抗

燔之炙之傳云炕火曰炙正義云炕舉也謂以物貫之
而舉於火上以炙之馥案漢書揚雄傳炕浮柱之飛棖
顏注炕與抗同舉也言舉立浮柱而駕飛棖

夜何其

夜何其曲禮梁曰薶其注云其詞也釋文云其字又作
箕同音姬語詞也案檀弓何居注云居讀爲姬姓之姬

齊魯之間語助也然則其箕居姬音義同

弗

弗祿爾康矣郭注爾雅引作祓祿案生民以弗無子箋云弗之言祓也

靡神不宗

靡神不宗後漢順帝詔作靡神不崇案禮記祭法幽宗祭星也雩宗祭水旱也鄭注宗皆當為崇崇之言營也

讐

無言不讐毛傳讐用也案集韻讐古文作周馥疑毛傳以周釋讐讐譌周為用

九折之澤

鶴鳴于九臯韓詩章句九臯九折之澤論衡鶴鳴九折之澤馥謂九折者如九折之阪是也澤不得言折二澤字竝當作臯臯乃臯之正體隸作罕因譌為澤

翳

皇矣其蓄其翳釋文云翳韓詩作殪案釋名殪翳也就隱翳也

媚

文選江賦蚺螭鱉媚李善注云媚食之顏色有愛媚案詩思齊思媚周姜毛傳云媚愛也卷阿媚於天子下武

媚茲一人鄭箋竝云媚愛也宣三年左傳人服媚之杜
注媚愛也

栴

象之栴也廣韻從木作栴云栴枝整髮釵也釋名簪枝
也因形名之也晉書輿服志皮弁象玉邱注云邱冠下
抵也象骨爲之音帝案邱抵通宋玉風賦邱萼葉而振
氣史記河渠書西邱瓠口皆以邱爲抵邱卽廣韻之栴
詩從手廣韻云栴佩飾或因詩爲義但栴栴俱不見於
說文吾友莊君述祖欲篆毛詩凡假借字各還本體寫
至栴字不得其義舉以見問余謂栴卽擿之異文說文

擿搔也搔拮也拮絜也髻絜髮也髀骨擿之可會髮者
引詩髀弁如星然則擿搔爲會髮絜髮之具也

暨

假樂民之攸暨傳云暨息也成二年左傳引詩作暨杜
注暨息也一切經音義憩說文作惕蒼頡篇作屨馥案
玉篇屨息也

茶

出其東門有女如荼箋云茶茅秀案經典多用茶字旣
夕記茵著用茶注云茶茅秀也周禮掌茶注云茶茅莠
考工記鮑人之事望而眡之欲其茶白也注云當如茅

莠之色吳語皆白常白旂素甲白羽之贈望之如茶韋
注茶茅秀也漢書禮樂志顏如茶應劭曰茶野菅白華
也馥謂茶當爲萑萑茶聲相近借茶字說文萑萑萑也
或又作蔣廣雅蔣菘茅秀也集韻蔣亦作萑古作茶
謹就

駟駟牧馬

室人交徧摧我釋文云摧韓詩作謹就也案就當爲訖
字之誤也鄭箋所謂刺譏之言

駟駟牧馬傳云駟駟良馬腹幹肥張也案玉篇駟與駟
同詩釋文云駟古熒反說文作駟考說文駟牧馬苑也
引詩在駟之野駟馬盛肥也引詩四牡駟駟兩字竝音
古熒切馥謂四牡駟駟後人亂之當爲駟駟牧馬毛傳
腹幹肥張卽說文盛肥義詩以駟駟代駟駟又以坰野
代駟野讀者茫然幸有玉篇釋文可爲推正說文雖亂
尙能理之

疹

釋文引韓詩胡寧疹我以旱疹重也案疹通作疹釋言
疹重也隱三年左傳憾而能疹者鮮矣杜注不能自安
自重

忖度

他人有心予忖度之當爲刊劓說文刊切也劓判也玉藻瓜祭上環注云上環頭忖也釋文云忖本又作刊切也漢書元帝紀自度曲被歌聲分刊節度韋昭曰刊切也謂能分切句絕爲之節制也

服箱

大東睨彼牽牛不以服箱傳云服牝服也箱大車之箱也箋云牽牛不可用於牝服之箱戴侗曰按毛鄭皆以服與箱爲二物說文徑以箱爲牝服詳詩人辭意服如服牛服鹽車之服謂星雖有牽牛而不可用之以服車箱也馥案後漢書張衡傳羈要裊以服箱

變

車牽思變季女逝兮傳云變貌案說文變慕也與思變意合

迺

長發百祿是迺傳云迺聚也案訓聚乃摛字義說文引詩作擘破斧傳云迺固也廣韻擘固也是詩借迺字長發迺字亦訓固爲得

優

瞻卬天之降罔惟其優矣傳云優渥也箋云優寬也信南山旣優旣渥箋云潤澤饒洽案說文優饒也漫澤多

也瞻卬之優箋義得之信南山之優當爲漫

升氣

蝮蝮朝躋于西崇朝其雨箋云朝有升氣于西方案釋名蝮蝮見於西方曰升朝日始升而出見也

唐棣

論語引詩唐棣之華偏其反而注云唐棣移也華反而後合本草拾遺扶移木花反而後合劉氏新論明權篇若唐棣之華反而更合也

繼檠

角弓翩其反矣傳云不善繼檠巧用則翩然而反案荀子非相篇故君子之度己則以繩接人則用拙注云韓侍郎云拙者檠拙也匡弓弩之器也

藝

行葦舍矢旣均傳云已均中藝箋云藝質也文六年左傳陳之藝極注云藝準也漢書司馬相如傳弦矢分藝殪仆文穎曰所射準的爲藝顏師古曰藝謂射的卽今之垛上檠也藝讀與藝同字亦作臬音魚列反馥案藝臬聲相近寢或作噤是也

演安

士昏禮贊洗爵酌醕主人注云醕漱也醕之言演也安

也士虞禮主人洗廢爵酌酒醕尸注云醕安食也昏禮合盞而醕正義云醕演也謂食畢飲酒演安馥案演或作衍特牲饋食禮主人洗角升酌醕尸注云醕猶衍也

厭

鄉飲酒禮賓厭介鄭注推手曰揖引手曰厭疏云引手曰厭者以手向身引之秋官司儀疏云凡揖皆推手至於擡卽引手爲異也馥謂厭引手卽擡也

啐

士冠禮啐醴雜記主人之酢也啐之衆賓兄弟則皆啐之注云啐啐皆嘗也啐至齒啐入口書顧命傳云啐至

齒正義云啐入口是啐至於齒馥謂啐當爲啐說文啐小飲也集韻啐小飲又云少飲酒也卽啐字義

苟敬

燕禮記賓爲苟敬鄭注苟且也假也聘禮記賓爲苟敬注云苟敬者主人所以小敬也又注大射儀云阼階上近君近君則親寵苟敬私昵之坐案敬從苟苟音已力切說文苟自急救也從羊省從口口猶慎言也馥謂此是從芋之苟鄭誤以爲從艸之苟又箋詩無曰苟矣亦解爲苟且之苟馥謂苟與下逝字失韻詩亦從芋之苟蓋謂無曰已能慎言也

敬姓分爲二姓一曰𪔐一曰文敬從苟攴非𪔐文二姓皆失之

韋當

鄉射記幅韋當注云直心背之衣曰當濟陽張蒿庵說云韋當者以韋束幅之中央如人心背之衣也馥謂卽兩當釋名其一當胷其一當背是也今謂之背心

繹

旣夕記冠六升外繹謂縫著於武也考工記玉人之事天子圭中必注云必讀如鹿車繹之繹謂以紐約其中央爲執之以備失隊方言車下鉄陳宋淮楚之間謂之畢大者謂之綦注云鹿車也馥案鉄當爲秩旣夕所謂外繹玉人所謂中必言縫秩而約束之

搢

大射儀搢三挾一个注云搢扱也案夏官田僕凡田王提馬而走諸侯晉注云晉猶抑也馥案搢晉義同抑馬猶言收馬扱亦收也漢書刑法志負矢五十个孫炎漏刻銘累箇三階馥謂箇亦矢也後漢律歷志孔壺爲漏浮箭爲刻王褒賦挈壺司刻漏尊瀉流仙叟秉矢隨水沈浮

絹綱耳

大射儀中離維綱注云侯有上下綱其邪制躬舌之角者爲維或曰維當爲絹絹綱耳疏云梓人云上綱與下綱出舌尋絹寸焉注綱所以繫侯植者上下皆出舌一尋者亦人張手之節也鄭司農云絹籠綱者維持侯者若然則綱與維當用繩爲之又以布爲絹籠綱然後以上下下個邊綴著絹兩頭以綱繫著植維者於上下下個上下躬兩頭皆有角又以小繩綴角繫著植故矢或離綱或離維也絹綱耳者以絹爲綱耳離著絹也釋文云絹劉侯犬反又於貧反一音古縣反又古犬反馥案梓人絹作緝釋文音於貧反或尤粉反劉侯犬反一音

古犬反是釋文不能定其字與音也說文緝持綱紐也引周禮緝寸廣韻緝爲贊切繩紐玉篇緝維持繩紐細者馥謂鄭注兩絹字竝當作緝傳寫譌謬賈氏沿襲不察爾綱耳當爲綱紐

豐

嘉定錢君

大昭

有古瓦頭禪文曰𨾏案豐古文從𨾏是

𨾏爲古文曲爲小篆今說文豐言象形後人亂之儀禮大射儀膳尊兩甌在南有豐注云豐以承尊也其爲字從豆豐聲疏云此謂上聲下形之字年和穀豆多有故從豆爲形也

此臆說也本從俎豆之豆非亦豆字

豐當作

者承尊之器象

形也是以曲當作年之字豐當作下著豆今諸經皆以承尊爵之曲不用本字之曲而用豐年之豐故鄭還依豐字解之馥案賈氏謂曲爲承尊豐爲豐年其說本自明了俗本互誤讀之意晦今爲正其三字則賈說暢然矣

扼

喪服苴經大搨鄭注搨扼也案扼卽搨之或體字不應以或體釋正文馥謂當爲搨士喪禮苴經大搨鄭注搨搨也中人之手搨圍九寸是也搨扼以聲相通後漢書班固傳扼猛噬注云說文曰搨捉也音尼搨與扼通

楣

聘禮公當楣再拜注云楣謂之梁鄉飲酒禮主人阼階上當楣北面再拜注云楣前梁也鄉射記序則物當棟堂則物當楣注云是制五架之屋也正中曰棟次曰楣前曰楹書無逸乃或亮陰鄭本作梁闇注云楣謂之梁葛洪喪服變除云作廬先橫一木長梁著地因立細木於上以草被之旣葬則剪去此草之拍地以短柱柱起此橫梁之著地謂之柱楣楣一名梁馥案諸楣字竝當作楣釋宮楣謂之梁郭注門戶上橫梁釋文云楣忘悲反或作楣亾報反埤蒼云梁也呂伯雍云樞之橫梁馥

謂郭注乃相義寫者誤爲楣說文楣門樞之橫梁

聘禮記脫誤

聘禮記十斗曰斛十六斗曰簋十簋曰秉二百四十斗
四秉曰筥十筥曰稷十稷曰秬四百秉爲一秬說文秬
下引周禮曰二百四十斤爲秉四秉曰筥十筥曰稷十
稷曰秬四百秉爲一秬案所引卽聘禮記之文乃知二
百四十斗斗當爲斤又脫爲秉二字鄭注謂一車之米
秉有五簋誤以爲斗斛簋秉米之總數不知古本二百
四十斤曰秉乃由秉加重至秬爲禾之權數也

修止

周禮天官掌次注云次自修止之處案檀弓曾子與子
貢入於其廡而修容焉注云更莊飾

種麥

鄭注籩人云今河間以北煮種麥賣之名曰逢齊民要
術作三斛麥麴法烝炒生各一斛種卽鄭所云種麥

鵠

司裘王大射設其鵠注云謂之鵠者取名於鴉鵠鴉鵠
小鳥而難中大射儀注云鵠鳥名射之難中中之爲俊
是以所射於侯取名也淮南子曰鴉鵠知來案鴉鵠韋
鷩也說文鷩韋鷩山鵠知來事鳥也廣雅鴉鵠鷩也廣

韻鴝鵒知未來事噪則行人至鵒字或作鵒馥謂今俗呼乾鵒是也

方言齊魯間謂題肩爲鳴鳥案月令季冬之月征鳥厲疾注云征鳥題肩也齊人謂之擊征然則所云征者正也俗加鳥旁正鵒皆鳥之捷黠難中者

凌室

凌人掌冰正歲十有二月令斬冰三其凌注云凌冰室也案鄴中記冰井臺有冰室三

福室

籩人朝事之籩其實膾鮑魚脯鄭注鮑者於福室中糗乾之戴侗六書故引作福室案說文糗以火乾肉集韻糗或作福福亦作備馥謂福室作糗糒乾肉之處從木者寫誤也

失色

內饗鳥糗色而沙鳴狸鄭注失色不美澤也馥案玉篇糗牛色不美澤此訓卽糗鄭注鄭之失色蓋牛色之譌相保

地官大司徒令五家爲比使之相保鄭注保猶任也馥謂保正作阜說文阜相次也徐鍇曰五家爲阜也使相次比也十其總率也通作保說文什相什保也吳起

圖國篇鄉里相比什伍相保史記商君列傳令民爲什伍索隱引劉氏云五家爲保十家相連也馥謂相比相連卽相次

求牛

牛人凡祭祀共其享牛求牛鄭注求終也終事之牛謂所以繹者也馥謂求當爲練說文終下云練絲也

藥

草人凡糞種疆藥用糞注疆藥疆堅者案襄二十五年左傳數疆潦賈逵注疆藥燒礪之地廣韻作鹽云鹽土地之堅也玉篇作監云疆監堅大

師都

司常師都建旗注云師都六鄉六遂大夫也謂之師都都民之聚也疏云師衆也都聚也主鄉遂民衆所聚故謂之師都也案說文引作率都率與帥通周禮本作帥都寫者誤作師賈疏遂傳會其說鄭注不言作帥也率都者鄉遂大夫爲民率者也

琢駟

春官典瑞駟圭璋璧琮琥璜之渠眉先鄭云駟外有捷盧也皆爲開渠爲眉琢後鄭云駟讀爲組渠眉玉飾之溝琢也疏云此六玉兩頭皆有孔又於兩孔之間爲溝

渠於溝之兩畔稍高爲眉瑑以組穿聯於其中也馥案
眉瑑溝瑑竝當作從土之塚塚耕發土也玉篇瑑圭有
圻鄂先鄭所謂瑑有圻鄂瑑起塚卽圻鄂說文瑑圭璧
起兆瑑也兆瑑當爲坳塚駟借字當爲玨玨亦瑑也說
文玨琮玉之瑑卽考工記所云瑑琮也考古圖有駟琮
猶玨琮疏謂以組穿聯非是

忌

小史掌邦國之志鄭司農云志謂忌也案賈誼書不知
先王之諱與國之忌凡此屬太史之任也

翦闔

夏官圉師茨牆則翦闔注云茨蓋也闔苦也馥謂闔借
字正作蕩說文蕩蓋也

五盾

司兵掌五盾各辨其等以待軍事注云五盾干櫓之屬
其名未盡聞也案釋名盾大而平者曰吳魁爲魁帥所
持也隆者曰須盾須所持也約脇而鄒者曰陷虜狹而
長者曰步盾步兵所持與刀相配者也狹而短者曰子
盾車上所持者也馥謂五盾之名此或是與

畿

小子掌珥於社稷祈於五祀注云春官肆師職祈或作

畿秋官士師職曰凡刳頤則奉犬牲此刳頤正字與馥案畿本作畿故鄭以爲正字若畿甸字乃假借何得爲正體說文畿以血有所刳涂祭也

椁

秋官職金注云用金石者作槍雷椎椁之屬疏云皆謂守城禦捍之具釋文椁宅耕反集韻作椁云木弩

司刺

司刺注云刺殺也訊而有罪則殺之案其職云一刺曰訊羣臣再刺曰訊羣吏三刺曰訊萬民司刺與漢之刺史義同主廉察也漢書燕王旦傳遣幸臣之長安問禮

儀陰刺候朝廷事

司刺職云以此三法求民情斷民中而施上服下服之罪然後刑殺馥案三法謂三刺三宥三赦是三刺在三法之內也然後刑殺是三刺非刑殺也

骹

蜡氏掌除骹注云故書骹作脊鄭司農云脊讀爲殯謂死人骨也馥案漢書婁敬傳徒見羸齒老弱史記作羸瘠食貨志國亾損瘠卽骹字呂氏春秋正月紀揜骼羸骹高注骹讀水漬物之漬馥謂脊瘠殯漬皆與骹聲相近

枯

掌戮殺王之親者辜之注云辜之言枯也謂磔之案荀子正論篇云斬斷枯磔注云韓子曰采金之禁得而輒辜磔疑辜卽枯也馥案說文砧枯也玉篇砧砧乾通作辜說苑朽者揚其灰未朽者辜其尸

要辭

卿士辯其獄訟異其死刑之罪而要之鄭注要之爲其罪辭如今劾矣案襄十年左傳使王叔氏與伯輿合要王叔氏不能舉其契注云要契之辭馥謂要者約也說文契大約也史記高祖紀要束卽約束

軌

考工記軌前十尺而策半之注云書或作軌玄謂軌是軌法也馥案當云軌法也軌卽范之借字

駟琮

玉人之事駟琮注云駟讀爲組以組繫之因名焉案上文琢圭璋牙璋下文琢琮皆言文飾此駟琮亦文飾未必如鄭破爲組也當依說文作琮

伯用將

玉人之事伯用將釋文將如字劉音陽案說文伯用埒玉石半相埒也埒譌爲將劉音失之

鬣落

曲禮乘髦馬鄭注髦馬不鬣落也案落當爲銘說文銘
鬣也今人言落髮爲僧亦當爲銘梵書須髮自銘

縗緣

檀弓黃裏縗緣說文縗下云禮有縗緣戴侗曰禮止有
縗緣縗縗聲相近豈卽一字與

雉

申生雉經正義云雉牛鼻繩也申生以牛繩自縊而死
也案地官封人凡祭祀飾其牛牲設其楅衡置其絳鄭
司農云絳著牛鼻繩所以牽牛者今時謂之雉與古者

名同

經

經也者實也鄭注儀禮喪服云經之言實也明孝子有
忠賢之心釋名經實也傷催之實也

次舍

反哭於爾次注云次舍也案周禮天官掌次疏云次則
舍也言次謂次止言舍謂舍息

學官

漢五經立於學官學官卽教官說文教覺悟也篆文省
作學檀弓叔仲皮學子柳注云學教也王制天子命之

教然後爲學小學在公宮南之左大學在郊注云學所以學士之宮

呼

曾子聞之瞿然曰呼鄭注呼虛憊之聲馥案列子晝則呻呼卽事夜則昏憊而熟寐

陵躐

故喪事雖遠不陵節注云陵躐也馥案楚辭九歌凌余陣兮躐余行

桃茢

君臨臣喪以巫祝桃茢執戈惡之也鄭注茢萑苕可埽不祥襄二十九年左傳乃使巫以桃茢先祓殯杜注茢黍穰案說文梨黍穰茢芳也芳葦華也鄭注萑苕卽茢芳今人稱苕帚當爲芳帚後世易之以黍穰古皆用芳鄭說是

防墓崩

孔子旣得合葬於防曰吾聞之古也墓而不墳今丘也東西南北之人也不可以弗識也於是封之崇四尺孔子先反門人後雨甚至孔子問焉曰爾來何遲也曰防墓崩孔子不應三孔子泣然流涕曰吾聞之古不修墓

謹案崇四尺謂墳也鄭注土之高者曰墳是也防墓崩謂墓域鄭注墓謂兆域今之封塋也是也庾蔚謂防守其墓備擬其崩馥謂防守塋域恐其崩則修治之非修崇四尺之墳也檀弓又云易墓非古也鄭注易謂芟治草木不易者上陵也正義云墓謂冢旁之地又曲禮適墓不登壟注云壟冢也墓塋域馥謂墳爲上壟墓爲兆域諸說甚明檀弓旣言墓而不墳則墳墓各別不容互稱說者謂防墓崩卽新封四尺之墳遇雨而崩此非馥之所敢知也

方言葬而亡墳謂之墓王制不封不樹注云封謂聚土爲墳周禮曰以爵等爲上封之度檀弓旣葬而封廣輪揜坎其高可隱也注云隱據也封可手據謂高四尺所此言墳也曾子問下殤土周葬於園注云以其去成人遠不就墓也比墓於園則墓非墳矣唐書宋璟傳皇后父將葬故事墳高五丈一尺璟曰僭禮厚葬前世所戒故古墓而不墳又郭子儀傳著令一品墳崇丈八尺詔特增丈以表元功後漢書東平王上疏古者上隴且不欲其著明注云禮記曰古者墓而不墳故言其不欲著明又謝夷吾傳墓不起墳注云墓謂塋域墳謂築土

通鑑漢元帝遣使者祠祭蕭望之冢注云平日墓封曰冢高曰墳

楊慎曰邯鄲淳曹娥碑上墓起墳蓋言上其平墓而爲高墳也後世以墳墓混爲一遂疑其重複改爲立墓起墳非也

子卯

知悼子卒未葬平公飲酒鼓鐘杜蕢曰子卯不樂知悼子在堂斯其爲子卯也大矣注云紂以甲子死桀以乙卯亡王者謂之疾日不以舉樂爲吉事昭九年左傳辰在子卯謂之疾日君徹宴樂學人舍業爲疾故也賈注

與鄭同案翼奉風角云北方好行貪狼申子主之東方怒行陰賊亥卯主之貪狼必待陰賊而後動陰賊必待貪狼而後用二陰竝行是以王者忌子卯蓋五行有刑德行在東方子刑卯刑在北方卯刑子子卯互刑是以爲忌翼氏之說卽杜蕢所云子卯也知悼子在堂斯其爲子卯也大矣者子卯五行之忌尙不舉樂況大臣有喪更大於子卯矣漢書藝文志有五行奇肱刑德二十一卷又案駁鄭者云紂以甲子死武以甲子興桀以乙卯亡湯以乙卯興何爲疾日

漢有剛卯文曰疾日嚴卯此與正月剛卯不同非輔

劉之器乃厭勝也故以卯爲疾日

倮

郊特牲索祭祝于祊祊之爲言倮也注云索求神也倮猶索也馥案倮或作掠國策掠於郊野以足軍食謂求索於郊野

棨

喪大記大棺八寸屬六寸棨四寸從外嚮內親身也曾子問君出疆以三年之戒以棨從注云親身棺曰棨檀弓君卽位而爲棨注云棨謂柩棺親尸者增韻棨棺謂之櫬御覽引說文櫬附身棺也襄四年左傳定姒薨無

櫬杜注櫬身棺後漢書鄧騭傳乃肉袒輿櫬注云櫬親身棺也

謙

大學此之謂自謙鄭注謙讀爲慊慊之言厭也謂誠意自足朱子以爲快也足也馥案莊子天運篇盡去而後慊呂氏春秋知接篇易牙烹其子以慊寡人高注慊快示諸掌

中庸明乎郊社之禮禘嘗之義治國其如示諸掌乎鄭注示讀如寘諸河干之寘寘置也物而在掌中易爲知力者也案仲尼燕居入門而金作示情也升歌清廟示

德也下而管象示事也是故古之君子不必親相與言也
也以禮樂相示而已馥謂示諸掌當如禮樂相示之示
猶指示也故仲尼燕居亦云明乎郊社之義嘗禘之禮
治國其如指諸掌而已乎

洩

振河海而不洩復古編滌別作洩非集韻滌漏也吳質
荅東阿王書言辭漏滌是也隱元年左氏傳大隧之外
其樂也洩洩林注洩洩舒散相得之貌漢書食貨志粟
有所滌王莽傳憤耗不滌顏注竝云滌散也枚乘七發
精神越滌周書禹滌七十川大利天下是也

脩

春秋脩其祖廟鄭注脩謂埽糞也周禮大宰祀五帝則
掌百官之誓戒與其具脩鄭注脩埽除糞洒昭三十一
年左傳將使歸糞除宗祧以事君

五庫

月令審五庫蔡氏章句一曰車庫二曰兵庫三曰祭器
庫四曰樂器庫五曰晏器庫馥案商君書湯武破桀紂
海內無患遂築五庫藏五色兵偃武也

益其長

仲夏之月挺重囚益其長皇氏以爲增益囚之飯食馥

謂長卽糗內則五十異糗釋文云糗糧也

今月令

鄭注月令鴻鴈來云今月令鴻皆爲候正義云月令出有先後入禮記者爲古不入禮記者爲今則呂氏春秋是也馥案古月令謂明堂月令今月令謂後漢所行之月令鄭云漢始亦以驚蟄爲正月中雨水爲二月節馥案自劉歆作三統歷改雨水爲正月中驚蟄爲二月節後漢遂有改定之月令所謂今月令也

均田

夏小正農率均田傳云率者循也均田者始除田也言

農夫急除田也月令皆修封疆審端徑術又云先定準直農乃不惑鄭注準直謂封疆徑遂也引夏小正農率均田正義以農率爲田畷馥案鄭孔之說皆與傳異後世均田之法又與此異通鑑給事中李安世上言歲飢民流田業多爲豪右所占奪雖桑井難復宜更均量使力業相稱由是始議均田詔遣使者循行州郡與牧守均給天下之田諸男夫十五以上受露田四十畝婦人二十畝奴婢依良丁牛一頭受田三十畝限止四牛所受之田率倍之三易之田再倍之以供耕作及還受之盈縮人年及課則受田老免及身沒則還田奴婢牛隨

有無以還受初受田者男夫給二十畝課種桑五十株桑田皆爲世業身終不還恒計見口有盈者無受無還不足者受種如法盈者得賣其盈諸宰民之官各隨近給公田有差更代相付賣者坐如律

坏

坏城郭鄭注坏益也呂氏春秋作埒高注埒益也呂氏又云埒牆垣高注埒猶培也月令蟄蟲坏戶鄭注坏益也周書時訓解作附附卽埒字坏埒聲相近曾子問殯不耐祭鄭注耐當謂備聲之誤也又培塿說文作附婁

麻疇

月令章句麻田曰疇漢書音義如淳曰今隴西俗麻田歲歲糞種爲宿疇也說苑王子建出守於城父與成公乾遇於疇中問曰是何也曰疇也疇也者何也曰所以爲麻也

爛

禮器三獻爛注云爛沈肉於湯也祭義爛祭注云湯肉曰爛郊特牲血腥爛祭注云爛或爲臙玉篇臙禮記曰三獻臙沈肉於湯中也臙瀟也生熟半也馥謂爛假借臙俗作也依字當爲𦉰說文𦉰於湯中淪肉

晉書載記苻生傳活爛雞豚鶩三五十爲羣放之殿

中又借燐字儀禮有司徹乃歃尸俎注云古文歃作燐聘禮注膚豕肉也惟燐者有膚釋文燐一本作爛

眡于鬼神

韻會眡說文告也从耳彡聲或作眡通作眡禮記眡于鬼神注云告致也玉篇眡之忍切埤蒼云告也禮記曰眡于鬼神亦作眡馥案徐鉉說文無眡眡二文當出徐錯本玉篇引禮記作眡所見者古本也

箭筭

喪服小記箭筭終喪三年案謝靈運山居賦其竹則二箭殊葉自注云二箭一者苦箭大葉一者筭箭細葉

縉

玉藻齊則縉結佩而爵鞞注云縉屈也結又屈之既夕器西南上縉士喪禮縉絞橫三縮一注竝云縉屈也又陳襲事于房中西領南上不縉注云縉讀爲縉屈也江沔之間謂縉收繩爲縉史記楚世家王縉繳蘭臺徐廣曰縉縈也音爭馥案縉竝當作縉小爾雅詘而戾之曰縉說文縉紆未縈繩紆詘也一曰縈也鄭注兼詘縈二義

札樸第一

山陰 李信 校正

札樸第二目錄

温經

闕隧

餽口

蟻

慝

周旋

鵠

貫三人耳

在胸曰鞠

寤生二事

扞衛

毀

越

駢脅

不成

距躍三百

泝水

盛

魯人

振廩

丹漆若何

邾鄆

殪戎殷

重人

芟夷

駢旄

闔閭

勇爵

啓

男女以班

使公治問

復陶

褚

蠱

選

離衛

野合

天札

卞縣

戲陽

會有表

著

坻

庸

藉

逸詩

五侯

幹

匕矢鏃

鑿

漠然清靜

龍輔

貍製

麋

及良而卒

衷甸

發聲

及

無棣

屈產之乘

介雞

誦

灼

記曰

暴桑

昧

側

詒

未盡

嘔血

未滅

距堙

人名誤字

良恭

復言

德

雖欲勿用

汶上

亾

幾諫

晝寢

嘑

文史辭達

鄒人

約

政事

躁

憮然

稻

晉書說論語

遠庖廚

踵門

易其田疇

布縷

隱几

晝

好勇鬪很

範我馳驅

檇杙

挫

山徑之蹊間介然用之而成路

李善引孟子

擴充

憫

稱貸

標

折枝

追蠡

殼鯨

函人

札樸第二目錄終

札樸第二

曲阜 桂馥 未谷撰

溫經

闕隧

隱元年左傳潁考叔曰若闕地及泉隧而相見杜氏云
隧若今延道於闕地無注襄二十一年傳闕地下冰而
牀焉吳語闕為深溝於商魯之間北屬之沂管子山權
數篇北郭有掘闕而得龜者注云掘穿也求物及穿地
至泉曰闕文選秋興賦闕側足以及泉兮雖猴猿而不
履五臣云言留側足之地掘而及泉雖猴猿之捷豈能

履哉詩蜉蝣掘閱鄭箋掘地解閱謂其始生也然則掘
閱掘闕卽左氏闕地之義周禮闕狄玉藻作掘狄喪大
記夫人以屈狄內司服作闕狄先鄭云屈者音聲與闕
相似隧當爲閏說文兩官之間也徐鉉本音似醉切明
刻小字本誤改房九切兩官之間謂兩邊高中央下故
字从兩官晉文公請隧及郊外有隧竝當作閏經典變
作隧便於隸體耳

寤生二事

程魚門編修言鄭莊公寤生苦無比照閱數年余搜得
二事而編修歿矣崔鴻南燕錄晉咸康二年公孫夫人
晝寢生慕容德左右以告方寢而起慕容皝曰此兒易
生似鄭莊公長必有大德遂以德爲名三十國春秋前
秦蒲洪父懷歸於部落小帥其母姜氏因寤產洪驚悸
而寤

余初疑寤當作悟謂倒產及得二事不敢復執前說
矣

餽口

隱十一年傳寡人有弟不能和協而使餽其口於四方
注云餽鬻也正義云說文云餽寄食也昭七年傳云餽
於是鬻於是以餽予口釋言云餽饋也則餽是饋鬻別

名馥案釋言之餽本作鬻杜意以餽爲鬻故誤訓鬻當從說文寄食之義

扞衛

桓十二年傳楚伐絞軍其南門莫敖屈瑕曰絞小而輕則寡謀請無扞采樵者以誘之杜注扞衛也馥謂扞當爲斨說文斨止也言無止采樵者

蟻

春秋莊十八年秋有蟻服虔劉向皆以爲短狐案沙隨春秋例目云考隸古春秋作蟻音特又案呂覽任地篇大草不生又無蟻蟻高誘曰蟻或作螿後漢書明帝紀

去其螟蟻沙隨之說信爲有徵短狐非魯地所有也

毀

莊三十年傳鬪穀於菟爲令尹自毀其家以紓楚國之難杜注毀滅也馥案毀謂破家蒼頡篇毀破也

慝

莊二十五年傳唯正月之朔慝未作杜注慝陰氣案傳云夏六月朔日有食之鼓用牲於社非常也秋大水鼓用牲於社于門亦非常也馥謂慝本作恣說文恣失常也與傳意合

越

僖九年傳恐隕越于下注云隕越顛隊也案成二年傳射其左越于車下注云越隊也

周旋

僖二十三年傳其左執鞭弭右屬櫜鞬以與君周旋注云周旋相追逐也案十五年晉惠公與秦戰乘小駟慶鄭曰進退不可周旋不能君必悔之晉戎馬還濘而止馥謂還濘而止卽不能周旋宣十二年傳少進馬還注云還便旋不進文十八年傳行父還觀莒僕注云還猶周旋玉藻周還中規釋文還本亦作旋是也說文服下云車右騎所以舟旋又般下云辟也象舟之旋經典作

周還二文皆假借杜氏不解舟旋義釋爲追逐失之

駢脅

駢脅釋文云說文云駢脅并也案正義引說文駢脅并榦也韋注國語同釋文并下脫榦字

鵠

僖二十四年傳鄭子臧好聚鵠冠說文鵠知天將雨鳥也禮記曰知天文者冠鵠案子臧之鵠冠卽爾雅翠鵠郭註似燕紺色生鬱林者也說文知雨之鵠卽戰國策所稱啄蚌者也二鳥名同物異說者易誤

說文所引禮記今無此文逸周書知天文者冠鵠又

禮圖術氏冠鵠

不咸

僖二十四年傳昔周公弔二叔之不咸杜注咸同也馥案同當爲周莊子知北游周徧咸三者異名同實其指一也

貫三人耳

僖二十七年傳鞭七人貫三人耳正義云耳助句也馥案貫耳軍法也司馬法小罪聃說文聃軍法以矢貫耳也

距躍三百

廣韻趙下云超越案僖二十八年傳距躍三百曲踊三百注云距躍超越也曲踊跳踊也百猶勵也訓百爲勵所未能詳似不如超越義近

在胸曰鞞

詩小戎陰鞞塗續正義云鞞者以皮爲之繫於陰板之上令驂馬引之哀元年左傳我兩鞞將絕吾能止之正義云僖二十八年注云在胸曰鞞然則此皮約馬胸而引車軸也馥案此與陰板上之說大異僖二十八年傳所謂鞞鞞鞞杜所謂在胸曰鞞者兩鞞字皆斬之譌正義失於研審耳定九年傳吾從子如驂之斬正義云

說文云靳當膺也則靳是當胸之皮也馥謂此說得之
杜所云在胸卽說文之當膺

靳形似易誤小戎傳鞞環釋文云鞞本又作靳沈
云舊本皆作靳

泚水

僖三十三年傳晉陽處父侵蔡楚子上救之與晉師夾
泚而軍注云泚水出魯陽縣東經襄城定陵入汝釋文
音雉馥案泚借字當爲滄說文滄水出南陽魯陽堯山
東北入汝廣韻雉滄同紐竝音直几切

盛

文十二年經盛伯來奔莊八年公羊經夏師及齊師圍
成傳云成者盛也盛則何爲謂之成諱滅同姓也字通
作邲廣韻邲地名也在東平玉篇東平亢父縣有邲鄉
隱五年經衛師入邲穀梁云邲國也杜注左傳云東平
剛父縣西南有邲鄉僖二十四年左傳管蔡邲霍文之
昭也公羊所謂魯之同姓桓十一年經公會宋公于夫鐘杜注夫
鐘邲地馥謂此與魯孟氏之邲邑遠不相涉說者牽合
爲一失之

孟氏邲邑杜注謂在泰山鉅平縣東南括地志謂在
兗州泗水縣西北五十里

魯人

文十五年傳魯人以為敏注云無故揚其先祖之罪是不敏魯人以為敏明君子所不與也正義云魯人魯鈍之人馥案經書宋司馬華孫來盟傳云書曰宋司馬華孫貴之也是經傳皆無貶詞華耦以其曾祖督有罪自以為罪人子孫不敢與魯公宴可謂自審故魯人稱其敏敏審也僖二十三年傳辟不敏也注敏猶審也華督名在冊書世所共知何為揚其先祖之罪乎文十八年傳云魯人謂之哀姜豈亦魯鈍之人邪

振廩

文十六年傳振廩同食注云振發也案說文囿穀所振入宗廟粢盛顏注漢書昭帝紀廩穀所振入也

丹漆若何

宣二年傳役人曰從其有皮丹漆若何案華元驂乘歌牛則有皮犀兕尚多棄甲則那故役人云縱有皮其如無丹漆何蓋甲以丹漆為飾也襄三年傳使鄧廖帥組甲三百注云組甲漆甲正義云漆甲成組文今時漆甲有為文者

邾鄆

宣三年傳成王定鼎于邾鄆案京相璠曰邾山名鄆地

邑也寰宇記邙山在河南縣一名平逢山亦邙山之別名也史記索隱廓謂田厚耨

殪戎殷

宣六年傳引周書殪戎殷注云義取周武王以兵伐殷盡滅之案成二年傳左輪朱殷注云血色久則殷殷音近煙今人謂赤黑爲殷色馥謂殪戎殷殷亦血色猶言血流漂杵皆史之盛詞也中庸作壹戎衣齊人言殷聲如衣

重人

成五年傳晉侯以傳召伯宗伯宗辟重曰辟傳重人曰

待我不如捷之速也注云重載之車案宣十二年傳楚重至於邲注云重輜重也正義云輜重載物之車也說文云輜前後蔽也蔽前後以載物謂之輜車載物必重謂之重車人挽以行謂之輦襄十年傳稱秦堇父輦重如役挽此車也馥謂重人言待我不如捷之速是重人亦挽行挽重故不能急避

芟夷

成十三年傳芟夷我農功案說文芟以足蹋夷艸引春秋傳芟夷蕞崇之馥謂芟夷當爲芟夷夷平也讀如塞井夷竈之夷

駢旄

襄十年左傳吾七姓從王牲用備具王賴之而賜之駢旄之盟正義云旄謂尾也其旌旗之用故其字從旄旌旗行而從風偃也馥謂旄借字當作髦史傳髦皆借旄字此駢旄謂牛牲非犛牛故應稱髦不稱尾髦猶剛鬣柔毛耳

闔閭

襄十七年傳吾儕小人皆有闔廬以辟燥溼寒暑杜注闔謂門戶閉塞馥案晏子春秋作闔閭吳王名闔閭亦作闔廬

勇爵

襄二十一年傳莊公爲勇爵注云設爵位以命勇士案勇爵以爵酒獎勵勇士如二桃也故殖綽郭最欲與焉欲飲此爵酒也若爵位豈二臣所敢干與

啓

廣雅啓膾也字林啓膾腸山海經無啓之國在長股東爲人無啓郭注啓肥腸也馥案襄二十三年傳啓牢成御肱商子車御大殿商子游御杜注左翼曰啓右翼曰肱大殿後軍馥謂啓卽啓三者皆取名於身殿卽展謂肱也肱卽胎掖下也

男女以班

襄二十五年傳男女以班劉炫云哀元年蔡人男女以辨與此同杜意男女分別將以賂晉也炫謂男女分別示晉以恐懼服罪非以爲賂也馥案鄭伐陳亦在襄二十五年陳侯使其衆男女別而纍以待於朝此言囚繫男女將爲鄭僕妾竝非賂鄭據此則劉之規杜是也

使公冶問

襄二十九年傳公還及方城季武子取卞使公冶問璽書追而與之杜讀問字絕句獨斷云季武子使公冶問璽書此諸侯大夫印稱璽也蔡讀璽書屬上

復陶

襄三十年傳使爲復陶杜注主衣服之官昭十二年傳楚子次於乾谿雨雪王皮冠秦復陶翠被豹舄執鞭以出杜注復陶秦所遺羽衣也釋文云復音服一音福馥案釋名翻陶也其貌陶陶下垂也復陶蓋以羽爲之有似於翻故可障雨雪也

褚

襄三十年傳子產爲政一年輿人誦之曰取我衣冠而褚之取我田疇而伍之杜注褚畜也奢侈者畏法故畜藏案褚伍對言皆謂子產褚之伍之上文子產使都鄙

有章上下有服是取衣冠褚之也田有封洫廬井有伍是取田疇伍之也說文褚卒也卒衣有題識者子產使衣冠各有題識限以等級不得僭亂故輿人怨焉定十年傳叔孫氏之甲有物吾未敢以出注云物識也

蠱

昭元年傳穀之飛亦爲蠱論衡商蟲篇穀蟲曰蠱蠱若蛾矣粟米饑熟生蟲述異記晉末荊州久雨粟化爲蠱

蟲

選

昭元年傳秦后子有寵於桓如二君於景其母曰弗去

懼選杜注選數也恐景公數其罪而加戮馥案盤庚世選爾勞傳云選數也詩不可選也傳云不可數也朱穆絕交論引詩作不可算也論語何足算也漢書車丞相贊作何足選也馥謂選當爲巽說文巽具也算從具云數也聃從頭頭與巽同頭下云選具也選亦當爲巽

離衛

昭元年傳楚公子圍設服離衛注云二人執戈陳於前以自衛離陳也正義云離之爲陳雖無正訓兩人一左一右相離而行故稱離衛離亦陳之義馥謂比因二人執戈遂爲臆說也是年傳又云魏舒爲五陳以相離兩

於前伍於後專爲右角參爲左角偏爲前拒豈五陳亦
兩人一左一右相離而行耶離卽魚麗之麗麗旅行也

野合

史記梁公野合而生孔子案野合言未得成禮於女氏
之廟也昭元年傳楚公子圍娶於公孫段氏鄭行人請
墀聽命楚太宰曰圍布几筵告於莊共之廟而來若野
賜之是委君貺於草莽也又使圍蒙其先君杜注告先
君而來不得成禮於女氏之廟故以爲欺先君馥謂墀
在城外除地行婚禮卽野合也故曰野賜之

夭札

昭四年傳民不夭札注云短折爲夭夭死爲札釋文云

札側八反一音截夭死曰札字林作

此下脫
此字

壯列反云

夭死也又十九年傳札瘥夭昏注云夭死曰札小疫曰

瘥短折曰夭未名曰昏釋文云札側八反一音截夭死

也字林作死壯列反云夭死也馥案注及釋文皆誤注

所云夭死爲札當爲大死釋文引注夭死曰札亦當爲

大死玉篇死夭死與字林同廣韻死癘死卽大死周禮

大司樂大札令弛縣鄭注札疫癘也說文疫民皆疾也

民皆疾故曰大死大死曰札小疫曰瘥大死對小疫

卞縣

昭七年傳吾與子桃注云魯國卞縣東南有桃虛襄十七年傳齊侯伐我北鄙圍桃注云弁縣東南有桃虛案卞弁皆破體篆作𠄎韓勅碑作卞楷書之弁由篆變也卞由隸變也

戲陽

昭九年傳晉荀盈如齊逆女還六月卒於戲陽杜注魏郡內黃北有戲陽城後漢光武紀二年秋八月帝自將征五校丙辰幸內黃大破五校於蕘陽章懷注引左傳戲陽馥案說文義墨翟書從弗魏郡有蕘陽鄉戲借字卽蕘陽

會有表

昭十一年傳會有表注云野會設表以爲位正義云俗本表下有旗謬也野會設表以爲位亦當有物記處如今之位版也馥案說文朝會束茅表位曰蕘引國語致茅蕘表坐正義引覲禮上介奉其君之旂置于宮及周禮大司馬敎大閱門立四表又嫌不合大夫之會乃云大夫聚會亦應有以表位但無文以言耳馥謂國語表坐之言顯有按據何謂無文

著

傳文云朝有著定杜注著定朝內列位常處謂之表著

劉炫規過謂下文有著有表二文不同以著定爲朝有著不得謂之表著案劉說是也十二年傳云若不廢君命則固有著矣杜云著位次十六年傳云其祭在廟已有著位服虔云孔張先祖配廟食案

坻

昭十二年傳有酒如淮有肉如坻杜注淮水名坻山名劉炫謂山無名坻者以坻爲水中之地馥案劉氏規杜固多是處惟此說未允孔氏正義謂坻之小何得對淮之大水是也案坻依字當爲阨說文秦謂陵阪曰阨傳下文有酒如澠有肉如陵則知坻當作陵阪之阨矣

庸

昭十六年傳庸次比耦案方言庸代也廣雅次比代也

藉

昭十八年傳鄙人藉稻案史記武安侯傳今吾身在也而人皆藉吾弟注云藉蹈也說文藉下云艸不編狼藉

逸詩

昭十九年傳諺曰無過亂門呂氏春秋引詩同高誘曰逸詩案古者謠諺皆謂之詩其采於適人者如國風是也未采者傳聞里巷凡周秦諸書引詩不在四家編內者皆得之傳聞故曰逸詩或謂逸詩皆夫子所刪此淺

學之臆說也

五候

昭二十三年傳明其伍候董遇本作五候云四方及國中之姦謀也案周禮環人察軍慝鄭注慝陰姦也謂軍中有為慝者馥謂國中軍中其令一也

幹

昭二十五年傳唯是楸柎足以藉幹者案僖二十三年傳駢脅正義引說文駢脅并幹也晉語作駢脅韋注駢脅并幹也廣雅脅幹謂之肋春秋元命苞人勝八幹杜育菽賦脯則正膺通幹

匕矢鏃

昭二十六年傳射之中楯瓦繇胸汰輶匕入者三寸注云匕矢鏃也正義云今人猶謂箭鏃薄而長闊者為匕馥案方言凡箭其廣長而薄鏃者謂之鉞或謂之鈿郭注云江東呼鏃箭馥謂匕鏃聲近字異物同

鑿

苑子荆林雍斷其足鑿而乘於他車以歸杜注鑿一足行正義云說文鑿金聲也蓋擊金為聲亦名鑿馥案說文鑿讀若春秋傳曰鑿而乘它車是傳本作鑿故杜訓一足行轉寫通作鑿正義望文為義失之今說文闕鑿

字玉篇躔一足行貌廣韻躔一足跳行梅聖俞送寧鄉令張沆詩夔學林雍躔

五經文字鑿金聲也又一足行貌其誤與正義同

莫然清靜

昭二十八年傳引詩莫其德音而說之云德正應和曰莫杜注莫然清靜案說文漠清也今詩作貊傳云貊靜也釋文引韓詩作莫樂記引詩亦作莫貊卽貉釋詁貊靜也又云貉嘆定也釋文嘆本亦作莫詩又云求民之莫箋云求民之定釋言漠清也樊光云漠然清貌楚辭遠游漠虛靜以恬愉兮此皆清靜二義

龍輔

昭二十九年傳獻龍輔於齊侯杜注龍輔玉名正義云說文云瓏禱旱玉也爲龍文馥案龍輔謂龍節以玉爲函輔非禱旱之瓏

狸製

定九年傳衣狸製杜注製裘也案裘當爲裘字之誤也哀二十七年陳成子救鄭及濮雨成子衣製杖戈杜注製雨衣也說文裘艸雨衣裘裘形似故誤也同一製字此訓雨衣彼訓裘杜氏不應矛盾後人因狸可爲裘妄改之

麋

哀二年傳羅無勇麋之八年傳及潞麋之以入杜注麋束縛也釋文音上隕反今吾鄉猶有此語其字作麋玉篇麋束縛也廣韻云左傳無勇麋之束縛也

及良而卒

哀十五年傳楚伐吳陳使公孫貞子弔焉及良而卒吳人云以水潦之不時無乃廩然隕大夫之尸芋尹蓋曰雖隕於深淵則天命也非君與涉人之過也馥審其前後之言貞子歿於水杜注孔疏皆未之及

衷甸

哀十七年傳良夫乘衷甸杜注衷甸一轅卿車案說文佃中也引傳乘中佃又解云一轅車徐鍇繫傳曰佃謂中也古載物大車雙轅乘車一轅當中也馥案卿車廣韻作輕車今河南有一轅車

發聲

呼役夫呼發聲集韻音許箇切今蘇州松江人發聲類此

及

武虛谷問宣十四年傳屨及於室皇劔及於寢門之外車及於蒲胥之市及字何解馥荅曰追而及之也讀如

矯及諸其車之及楚王未納屨未帶劍未乘車急遽而走左右奉屨追及於窒皇奉劍追及於寢門之外御者駕車追及於蒲胥之市此猶宋武帝往西州幸徐羨之便步出西掖門羽儀絡驛追隨已出西明門矣呂氏春秋齊君乘駟而自追晏子及之國郊此及字義也成六年鄭伯朝晉子游相授玉於東楹之東鄭伯行疾東過子游奉玉及於東楹之東以授之與楚事相類

無棣

賜我先君履東至於海西至於河南至於穆陵北至於無棣杜注穆陵無棣皆齊境馥謂管仲此言盛稱踐履

之遠欲以威楚不皆齊境京相璠曰無棣在遼西孤竹縣漢書地理志遼西郡令支縣有孤竹城管仲舉此者以曾伐山戎也齊語北伐山戎荆令支斬孤竹韋昭注二國山戎之與也管仲特舉無棣使楚知畏實非齊先君踐履之界若但舉齊之四境不足威楚出言何謂且楚自知之無煩界量矣

史記齊世家及周成王少時管蔡作亂淮夷畔周乃使召康公命太公曰東至海西至河南至穆陵北至無棣五侯九伯實得征之集解引服虔曰是皆太公始受封土地疆境所至也索隱云舊說穆陵在會稽

非也按今淮南有故穆陵關是楚之境無棣在遼西
狐竹服虔以爲太公受封境界所至不然也蓋言其
征伐所至之域馥謂小司馬說是也管仲舉楚境之
穆陵以證齊伐楚非無因涉其地穆陵旣爲楚境則
無棣定非齊境矣

屈產之乘

晉荀息請以屈產之乘假道於虞公曰是吾寶也杜注
云屈地生良馬案屈產者馬之產晉地者也屈卽士蔣
爲夷吾所築之屈也其後夷吾與秦戰乘鄭所獻小駟
慶鄭曰古者大事必乘其產生其水土而知其人心安

其教訓而服習其道唯所納之無不如志今乘異產以
從戎事及懼而變將與人易亂氣狡憤陰血周作張脈
僨興外疆中乾進退不可周旋不能君必悔之馥謂以
屈產爲寶爲其晉產不同於異產也

服虔亦以屈爲地名產爲產生惟何休謂屈產之地
出名馬

介雞

案此用王親國學林說附會杜注非是

介其雞說者謂介爲甲韋昭云以芥傳雞羽案應瑒鬪
雞詩芥羽張金距褚玠詩芥羽雜塵生梁簡文帝詩芥
羽忽猜儔劉孝威詩翅中含芥粉庾信詩芥粉口春場

周王褒詩猜羣芥粉生竝作芥字

今雲南人鬪雞猶以辣椒傳其羽欲傷敵雞之目也

誦

子產相鄭有與人之誦案襄四年傳臧紇侵郟敗於狐
駘國人誦之晉語惠公入而背內外之賂與人誦之孔
叢陳士義篇孔子順曰先君初相魯魯人謗誦云云及
三年政成化行民又作誦云云馥謂此與鄭與人之誦
畧同詩誦言如醉王融策秀才文進講誦志以沃朕心
注云誦言也

灼

桓八年公羊傳夏曰禘何氏云薦尚麥魚始熟可灼故
曰禘案可灼當爲可灼釋天夏祭曰禘郭注新菜可灼
本何氏爲說也

記曰

僖二年公羊傳宮之奇果諫記曰脣亾則齒寒何休云
記史記也馥案記與志同左傳所稱前志軍志史佚之
志皆是也

暴桑

宣六年公羊傳活我於暴桑下者也注云暴桑蒲蘇桑
案左傳作翳桑然則蒲蘇卽嬖娒詩山有扶蘇傳云扶

蘇扶胥小木也馥謂扶蘇扶胥卽蒲蘇亦曰扶疏說文
扶扶疏四布也暴樸聲相近詩芄芃械樸傳云樸枹木
也箋云樸屬而生者枝條芃芃然釋木樸枹者郭注樸
屬叢生者爲枹詩所謂械樸枹櫟考工記凡察車之道
欲其樸屬而微至注云樸屬猶附著堅固貌也馥謂木
之叢生者始有扶疏之態李時珍曰樸櫟者嬖娑之貌
其樹偃蹇其枝芃芃故也俗呼衣服不整者爲樸櫟以
此尉繚子吳起與秦戰舍不平隴畝樸櫟蓋以蔽霜露
漢書息夫躬傳僕遯不足數

方言樸聚也郭注樸藜相著貌易繫于苞桑釋木如
竹箭曰苞郭注篠竹性叢生釋木枹適木魁癩郭注
謂樹木叢生根枝節目盤結塊磊釋文云適迫也謂
叢攢迫而生

昧

襄二十七年公羊傳昧雉彼視何云昧割也時割雉以
爲盟釋文云昧舊音列亾粉反一音末又音蔑案文從
本末之末傳寫或從午未字者誤玉篇昧莫割切廣韻
莫撥切春秋吳子夷昧卒釋文昧音末馥謂昧訓割以
聲爲義今俗謂列爲抹脖子

側

昭二十五年公羊傳以人爲蓄何云蓄周埒垣也所以分別內外衛威儀今大學辟雍作側字疏云謂何氏所注者是蓄字今漢時大學辟雍所讀者是側字案辟雍當爲辟靡卽牆也言漢以大學之辟靡名爲側非大學辟靡讀此傳文爲側也

詒

定元年穀梁傳夫清者非可詒託而往也必親之者也范注詒託猶假寄馥案詩子寧不嗣音嗣韓詩作詒云詒寄也會不寄問也

未盡

哀二年春秋取遼東田及沂西田穀梁傳取遼東田遼東未盡也及沂西田沂西未盡也注云以其言東西則知其未盡也馥案王制西不盡流沙南不盡衡山東不盡東海北不盡恒山斷長補短方三千里爲田八十萬億一萬億畝此言不盡卽穀梁未盡

嘔血

哀二年左傳吾伏弔嘔血賈注面汚血曰嘔杜注嘔吐也釋文云嘔本又作啗吐也晉語作啗血韋注面汚血曰啗此本賈說案啗或作啗新序兩手據地而歐之不

嘔

末減

說文徐鍇本濩下云減濩拭滅兒鍇繫傳曰左傳三數叔魚之惡不為濩減本此字今作末假借馥案減濩當為波濩末減當為濩波集韻濩下云波濩拭滅說文波下云濩波也玉篇作濩濩讀若茶椽之椽史記倉公傳望之殺然黃徐廣讀殺為蘇葛反馥謂濩波猶抹椽漢書谷永傳末殺災異是也

距堙

乘堙而窺宋城注云堙距堙上城具案距堙見孫子兵佑言土山即孫子所謂距堙是也

人名誤字

諸城劉衛川泌為余言士會當為土會本杜姓去木存土詩桑土韓詩作桑杜是也趙衰當為趙衰其字子餘釋詁哀多也易謙卦君子以裒多益寡是也馥謂晉先穀當為穀故字彘子鄭公子喜宋樂喜竝字子罕罕借字當為衍故宋公子衍字樂父

良恭

論語夫子溫良恭儉讓以得之皇侃疏行不犯物謂之

良馥案釋名良量也量力而動不敢越限也皇疏又云
和從不逆謂之恭馥案賈誼書接遇慎容謂之恭

復言

信近於義言可復也案哀十六年左傳吾聞勝也好復
言復言非信也杜注言之所許必欲復行之不顧道理
馥謂不顧道理則信不近義故曰非信

德

以直報怨以德報德賈誼書施行得理謂之德反德爲
怨案德本作惠說文惠外得於人內得於己也

雖欲勿用

雖欲勿用山川其舍諸案說文膏用也書微子今殷民
乃攘竊神祇之犧牲牲用汲豕周書用紂於南郊春秋
成十七年九月辛丑用郊公羊云或曰用然後郊僖十
九年邾人執繒子用之昭十一年楚師滅蔡執蔡世子
友以歸用之左氏傳平子伐莒取郟獻俘始用人於亳
社又介葛盧聞牛鳴曰是生三犧皆用之矣又賓孟見
雄雞自斷其尾侍者曰自憚其犧也遽歸告王曰雞其
憚爲人用乎又得用焉曰獲公羊傳於其歸焉用是乎
河說苑韓褐子濟于河津人告曰夫人過于此者未有
不快用者也而子不用乎韓褐子曰天子祭海內之神

諸侯祭封域之內大夫祭其親士祭其祖禰禡也未得
事河伯也

左傳宋公使邾文公用鄆子于次睢之社杜注此水
次有妖神蓋殺人而用祭穀梁云用之者叩其鼻以
衄社也范注取鼻血以釁祭社器馥案呂氏春秋湯
以身禱於桑林翦其髮割其爪以爲犧未嘗殺身穀
梁說是也唐武后有疾令閻朝隱禱少室山朝隱沐
浴伏身俎盤爲犧此亦用之之義吐蕃傳三歲一大
盟用人馬牛驢爲牲凡牲必折足裂腸陳於前使巫
告神曰渝盟者有如牲馥謂殺人爲牲羌夷之俗中

國不應爾定四年左傳王割子期之心以與隨人盟
注云當心前割取血以盟未至其心伍輯之從征記
臨沂厚丘閒有次睢里社常以人祭襄公使邾子用
是鄆子處相承雇貧人命齋潔祭時縛著社前如見
牲犧

汶上

則吾必在汶上矣玉海引曹氏曰汶在齊南魯北言欲
北如齊也馥案水以北爲陽凡言某水上者皆謂水北

亾

亾之命矣夫亾讀如無漢書宣元六王傳夫子所痛曰

木樓卷二
三
蔑之命矣夫顏師古曰蔑無也

新序作末之命矣夫末蔑聲相近說文首讀若末

幾諫

事父母幾諫案曲禮不顯諫鄭注謂明言其君之惡不
幾微

畫寢

宰予畫寢舊說畫當爲畫謂刻畫寢室案周書蘇綽傳
若刀筆之中而得澆僞則是飾畫朽木說目一時不可
以充椽椽之用也此本論語

嗙

廣韻言弔失國嗙弔失容論語由也嗙鄭注子路之行
失於畔嗙疏云舊注作呷嗙字書云呷嗙失容也馥案
宋書始平王子鸞傳弔新宮之奄映嗙壁臺之蕪踐左
氏春秋齊侯使高張來唁公釋文唁音彥

文史辭達

文勝質則史又曰辭達而已矣聘禮記辭多則史少則
不達辭苟足以達義之至也

鄆人

孰謂鄆人之子知禮乎案文十五年左傳下人以告注
云卞人魯下邑大夫正義云治邑大夫例呼爲人孔子

父爲鄆邑大夫謂之鄆人

約

不仁者不可以久處約坊記小人貧斯約注云約猶窮也楚辭招魂土伯九約注云約屈也定三年左傳君以弄馬之故隱君身杜注隱憂約也

政事

其事也如有政雖不吾以吾其與聞之孟子發於其政害於其事左傳爲政事庸力杜注在君爲政在臣爲事

躁

言未及之而言謂之躁釋文云魯讀躁爲傲案荀子勸

學篇不問而告謂之傲

憊然

夫子憊然皇侃曰憊然猶驚愕也案三蒼憊失意兒也怪愕之詞也

稻

食夫稻稻謂黏者說文稊稻不黏者是不黏者非真稻矣又云沛國謂稻曰稊稊俗作糯音奴臥切黏者也又云糝稻餅也餼熬稻餼餽也餌粉餅也糝熬餌黏也此數味以稻作之皆黏乃真稻矣凡穀皆以黏爲上秣稷之黏者也藁紅而黏芑白而黏與秬秠並稱嘉穀是也

穀貴黏者爲其可以釀也聘禮注凡酒稻爲上黍次之
梁次之說文秬一稗二米所以釀也鬯以秬釀鬱艸黍
禾屬而黏者也孔子曰黍可爲酒禾入水也八月黍成
可爲酎酒酒之用大矣漢書食貨志酒者天之美祿帝
王所以頤養天下享祀祈福扶衰養疾百禮之會非酒
不行

漢律稻米一斗得酒一斗爲上尊稷米一斗得酒一
斗爲中尊粟米一斗得酒一斗爲下尊顏師古曰稷
卽粟也中尊者宜爲黍米不當言稷馥案稷謂秫也
秫爲稷之一種故秫亦得稱稷杜康始作秫酒

晉書說論語

晉書食貨志引論語加之以師旅因之以饑饉此言兵
凶之謀而沴氣應之也案潘岳關中詩師旅旣加饑饉
是因

遠庖廚

孟子遠庖廚案內則天子之閣左達五右達五注云五
者三牲之肉及魚腊也正義引崔氏云宮室之制中央
爲正室正室左右爲房房外有序序外有夾室天子尊
庖廚遠故左夾室五閣右夾室五閣玉藻君子遠庖廚
凡有血氣之類弗身踐也

踵門

踵門而告文公趙注踵至也案莊子德充符踵見仲尼郭注踵頻也說文踵往來兒馥謂踵門頻至門也

易其田疇

易其田疇注云易治也案檀弓易墓非古也注云易謂芟治草木

布縷

有布縷之征案周禮廛人掌紵布鄭司農云紵布列肆之稅布

隱几

隱几而臥趙注隱倚其几而臥案檀弓既葬而封廣輪揜坎其高可隱也注云隱據也封可手據隱正作等說文等所依據也讀與隱同

畫

風俗通孟嘗君逐於齊見反譚子迎於澶史記田單傳燕入齊聞畫邑人王蠋賢封以萬家水經注淄水云王蠋墓在澶水南山西馥謂孟子宿於畫當作澶蓋地以水得名傳寫省水作畫又譌作畫廣韻澶水名在齊

好勇鬪很

好勇鬪很以危父母正義云好勇暴好爭鬪好頑很以

驚危父母案曲禮很母求勝鄭注很闖也謂爭訟也唐書高麗傳今男生兄弟闖很通鑑辛毗論袁譚袁尙兄弟讒闖胡三省注闖闖也很也戾也馥謂闖很卽爭訟非爭鬪頑很

範我馳驅

吾爲之範我馳驅孫氏音義云範我或作范氏范氏古之善御者馥謂范當爲範範法也馳驅有法故曰范氏與考工記稱某氏同後之世其業者卽爲範姓所見古銅印范姓皆從竹隸體竹艸不分今爲從艸之范矣

檇杙

楚之檇杙借杙字當爲檇杙說文杙斷也檇斷木也引春秋傳檇杙徐鍇繫傳杙之言兀也檇杙短木

挫

思以一毫挫於人若撻之於市朝秦策甘茂曰公孫衍樛里疾挫我於內史記蜀守馮當暴挫注云暴雪以挫人淮南說山訓君子不入市爲其挫廉也高注挫辱也山徑之蹊間介然用之而成路

山徑之蹊間介然絕句文選長笛賦是以閒介無蹊人迹罕到五臣注云竹間介然幽深無蹊徑人迹稀至也襄九年左傳介居二大國之間杜注介猶閒也閒介連

文不得以介下屬又案法言山崆之蹊李九函谷關賦
於北則有蕭居天井壺口石徑法言所云山崆賦所云
石徑卽井陘之陘爾雅山絕陘是也孟子山徑亦山陘
李善引孟子

文選江文通詣建平王上書剖心摩踵李善云孟子曰
墨子兼愛摩頂致於踵利天下爲之劉熙曰致至也又
任彥升奏彈曹景宗自頂至踵李善云孟子曰墨子兼
愛摩頂致於踵趙岐曰致至也案今本作放踵又放乎
四海趙注放至也

擴充

知皆擴而充之矣字又作擴集韻擴充也或借葶字新
序譬之其猶葶革者也大則大矣裂之道也馥謂依字
作擴張弩使滿也

丹封案禮記祭義溥之而橫乎四海孔子閒居孔子
曰夫民之父母乎必達於禮樂之原以致五至而行
三無以橫於天下鄭注橫充也疑竝擴之借字

憫

阨窮而不憫注云憫憊也案廣雅憫憊也說文悶憊也
易乾卦遯世无悶

稱貸

文不得以介下屬又案法言山崆之蹊李九函谷關賦
於北則有蕭居天井壺口石徑法言所云山崆賦所云
石徑卽井陘之陘爾雅山絕陘是也孟子山徑亦山陘
李善引孟子

文選江文通詣建平王上書剖心摩踵李善云孟子曰
墨子兼愛摩頂致於踵利天下爲之劉熙曰致至也又
任彥升奏彈曹景宗自頂至踵李善云孟子曰墨子兼
愛摩頂致於踵趙岐曰致至也案今本作放踵又放乎
四海趙注放至也

擴充

知皆擴而充之矣字又作擴集韻擴充也或借蕲字新
序譬之其猶蕲革者也大則大矣裂之道也馥謂依字
作擴張弩使滿也

丹封案禮記祭義溥之而橫乎四海孔子閒居孔子
曰夫民之父母乎必達於禮樂之原以致五至而行
三無以橫於天下鄭注橫充也疑竝擴之借字

憫

阨窮而不憫注云憫憊也案廣雅憫憊也說文悶憊也
易乾卦遯世无悶

稱貸

又稱貸而益之案漢書食貨志當其有者半價而賣
者取倍稱之息顏師古曰稱舉也俗謂之舉錢周禮小
宰聽稱責以傳別先鄭云稱責謂貸予

標

標使者出諸大門之外案莊十三年公羊傳曹子標劍
而去之何注標辟也

折枝

爲長者折枝案續說苑宦者田鵬爲周人所獲問齊主
所在給云已去周人折其支每折一支辭色愈厲四支
俱絕而死馥案枝支皆借字當爲肢孟子折枝猶今之

按摩動搖其四肢也周人折支拉斷其四肢也

追蠡

考工記鼻氏爲鐘鐘縣謂之旋旋蟲謂之幹案幹所以
制旋者字當爲幹說文幹蠡柄也馥謂卽孟子所云追
蠡

穀觶

吾不忍其穀觶周成難字云斗擲穀觶也穀音都穀反
穀音蘇穀反

函人

函人惟恐傷人案陳琳武庫賦鎧則東胡闕鞏百鍊精

札樸卷二
剛函師振錐韋人製縫

札樸第二

山陰 李信 校正



